



EM 2018/193

22/10-2018

Randi Vestergaard Evaldsen

Uunga siunnersuut: Kommunit suliffeqarfiutaasa pigisaasa sanaartukkanillu pigisaasa ilaasa pisiarinerinut, qularnaveeqqusernerinut attartornerannulluunniit akuersisarneq pillugu Inatsisartut inatsisaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

(Siullermeerneqarnera)

Demokraatini pineqartoq pillugu siunnersuut saqqummiunneqaqqaartoq iluarisimangilarput isumaqaratta kommunit nammineersinnaatitaanerannut angivallaamik akulerunnerusoq.

Aamma borgmesterit tallimat tamanna ernummatigalugu nalunaarput, ataatsimoorlutik siunnersuummut akerliliinermikkut.

Tamanna tunngavigalugu nuannaarutigaarput Naalakkersuisut isornartorsiuinermut siutitik ammatissimammatigit iluarsillutillu. Uani siunnersuummi maannakkut saqqummiunneqartumi aalajangerneqarpoq, kommunalbestyrelsit tassaasut aalajangisussat, suliffiit kommunit pigisaat taarsigassarsiniarsinnaassanersut ilaalu ilanngullugit. Siullermut saqqummiunneqartumut naleqqiullugu suliassaq taanna Naalakkersuisuniit kommunalbestyrelsinut taamaasilluni tunniunneqarpoq. Tamannalu Demokraatini nuannaarutigaarput.

Naatsorsuutigaarput Inatsisinut Ataatsimiititaliap aappaaneerisoqannginnerani siunnersuut sukumiisumik oqallisigiumaaraa qilanaaraarpullu isumaliutissiissut taakkunanngaanniit takkukkumaartussap atuarnissaa.